

# Dendam alam semula jadi



**K**ALAU nak kata Kunta Kinte kejam, tak ada hati perut, katalah. Tapi Kunta Kinte tetap nak kata sekali lagi, orang yang takut kena landa ombak, jangan buat rumah di tepi pantai dan yang takut tenggelam banjir, jangan buat rumah di tepi sungai.

Buatlah rumah di atas bukit atau gunung. Tapi kenalah ingat, rumah atas gunung, tepi bukit dan dalam lembah boleh ditimbus tanah runtu-pula.

Sebenarnya, tak ada tempat yang selamat sepenuhnya atau bahaya sepanjang masa. Yang ada, adalah kepandaian kita kawal keadaan. Dalam bahasa Inggeris dipanggil 'managing the risk' atau menguruskannya.

Sebab itulah jarang sangat kita tengok pelumba motosikal mati walaupun jatuh tunggang-langgang pada kelajuan yang luar biasa. Sekali-sekala tentu ada, tapi tak selalu macam yang naik motosikal di jalan raya Malaysia.

Pada tahun 2009, penunggang Mo-

toGP pasukan Repsol Honda, Dani Pedrosa, jadi manusia pertama paling laju atas motosikal. Dia catat kelajuan 349.288 kilometer sejam di litar lumba Mugello, Itali. Bandingkan kelajuan itu dengan had kelajuan maksimum 110km/s di lebuh raya kita.

Kunta Kinte sebut hal ini sebab setiap kali ada orang jadi mangsa banjir atau bencana alam lain, ramai yang salahkan alam semula jadi. Bencana alam bukan kejadian baru. Bencana alam sama tua dengan tamadun manusia.

Yang berbeza hanyalah skala dan laporan mengenainya. Dulu, kalau banjir sikit-sikit orang tak peduli dan tak cerita pun. Kerajaan pun tak ambil peduli sangat. Bawa hal masing-masinglah.

Itulah banjir yang Kunta Kinte alami masa berumah di tebing Sungai Pendang pada tahun 1940-an dan 1950-an. Hari ini, di tempat yang sama, boleh kata tiap-tiap tahun banjir dan beratus kena pindah. Yang mati lemas pun ada.

Bukan apa, tapi pasal makin ramai yang buat rumah tepi sungai, di bawah paras sungai dan atas tanah. Orang sekarang tak buat rumah yang ada tiang macam dulu lagi.

Bila hujan lebat di hulu dan air sungai melimpahi tetambak, tenggelamlah kawasan rendah di tebing sungai. Dulu tak ada tetambak buatan manusia. Bila air bah, kedua-dua lembah sungai tenggelam sampai berbatu luasnya dan beberapa minggu lamanya.

Tak jadi masalah pun sebab rumah kita atas tiang, lima enam kaki tinggi, dan kita belajar kawal bahaya banjir. Jarang sangat orang mati lemas. Kita ada dah perahu dan rakit. Masa banjir makmur, pasal ikan banyak dan lepas banjir sawah bendang subur kerana lumpur dari hulu.

Sekarang tebing sungai ditambak, pintu kuala ditutup, air tak pasang surut lagi, sungai berlumpur tapi lumpur yang terkumpul tak digali. Itu tabiat orang kitalah - tahu bina tapi tak peduli nak selenggara.

Paya dipugar jadi bendang dan rumah batu tanpa tiang didirikan. Bila hujan lebat turun lama sikit, air melimpahi tetambak, sungai ambil balik paya dan rumah tanpa tiang pun tenggelam.

Salah siapa? Takkan sampai bila-bila pun nak salahkan cuaca dan alam semula jadi? Siapa yang ubah alam semula jadi dengan tidak lang-

*Sekarang tebing sungai ditambak, pintu kuala ditutup, air tak pasang surut lagi, sungai berlumpur tapi lumpur yang terkumpul tak digali*

sung tunjuk hormat kepada ciptaan Allah?

Jadi Kunta Kinte gelak sajalah bila baca Laporan 2010 Ketua Jurauudit Negara yang, antara lain, kata Kedah boleh atasi banjir kalau beberapa kelemahan diatasi.

Laporan itu kata, banjir besar di Kedah berlaku pasal rizab sungai kena ceroboh sampai tak boleh dilaksanakan kerja-kerja kawal banjir.

Macam Kunta Kinte katalah, macam mana tak bah besar. Tebing sungai ditambak, pintu kuala ditutup, air tak pasang surut lagi, selut dalam sungai tak dibuag, rizab sungai dipugar dan pegawai yang jaga sungai, tali air dan parit asyik releks dalam bilik hawa dingin saja.

Mana ada pegawai DID lagi! Dulu kita tabik hormat pegawai DID - Drainage and Irrigation Department - Jabatan Parit dan Tali air. Mereka betul-betul jaga parit, sungai dan tali air supaya selalu ber-

sih. Ramai nak buat pegawai DID menantu.

Jangan salahkan Kedah saja. Satu Malaysia sama. Sekarang longkang di Kuala Lumpur pun tak siapa peduli. Ditutup rapat-rapat, jauh di mata, jauh di hati. Bila hujan lebat dan banjir kilat, hingar-bingar satu negara.

Maaf cakaplah, sebenarnya negara kita makin hari makin teruk. Makin hari makin ramai orang yang kita bagi mandat dan bagi upah, asyik gebang kosong dalam surat khabar, dalam Blog, dalam Facebook, dalam Twitter dan macam-macam tong kosong lagi. Kerja, wallahualam, belum tentu jadi.

Yang Kunta Kinte nampak, wal hasil balik asal, itu pasal tak hasil. Bila manusia ubah alam semula jadi ciptaan Allah dengan buta-tuli dan lepas itu tak ambil peduli, tung-gu sajalah, masanya akan tiba bila alam semula jadi akan balas dendam.